

Erich Bolinius
www.erichbolinius.de

(Bericht über den BSV Kickers Emden
Sendung „Flutlicht“ auf Radio Ostfriesland
Donnerstag, 13.3.2014 18.00 Uhr auf 94.0 bzw. 87,7)

Moin, leev Toehörers,
as ik lesd Sönnndag um Klock fiev mit ´n de overall bekannte Kickersfans, Stephan, Hans (Holle) un Rolf na Leer fahren bün, um mi dat Spöl Germania Leer tegen Kickers Emden antoekieken, was ik overtügt, dat Kickers dat Spöl winnen dee. Man dat is ja anners komen - un dorvan will ik vandaag vertellen.

Bi dat Ankomen in ´t Stadion wurren de Fans van Kickers Emden un Germania Leer trennt. Dat heet, de Fans müssen verskeden Ingangen nehmen. Man so recht kontrollleert wurr dat neet. De Kontrolleuren harren groot Biller in de Hannen, up de Gesichten stunnen. De Lü dürfen wall neet in ´t Stadion laten. Of se dormit well snappt hebben, weet ik neet. Löv ik aber neet.

Up uns Sied, wor de Toekiekers ut Emden stunnen, hebb ik ok heel völ Leeraners utmaakt. Gung de hele Spöl fredelk toe. Lagg seker ok doran, dat Berthold, he word ja noch, so stunn dat toeminnst in ´t Bladd, as „Fanbeupdrager“ van Kickers Emden föhrt. Villicht kann he naderhand hier noch sülvst wat toe seggen.

Vör dat Spöl wurr over Luudspreeker de Mannskuppupstellen dörgeven. Man dorvan kunnst nix verstahn, so undüdelk was de Ansaag. Un ok kunn man neet utmaken – sehn of hören – weffe Spöler ut- of inwesselt wurr. Dat was keen Landesliganiveau!

Dor mutt ik de Kickers-Ansegger in ´t Oostfreeslandstadion **Gerd Krauledat** doch loben, dat is ´n heel anner Wark.

Nu toe dat Spöl, de vör 800 Toekiekers ruugweg 10 Menüter later anfleit wurr.

As ´n verunglückte Skoet van **Benjamin Lünemann**, de Spöler mit de Nummer 11, de ok al bi Kickers Emden spölt hett, in d´ Straafruum van Kickers kwamm, reagerte **Mathias Goosmann** an fellsten un skoot de Ball ut acht Meter unner de Latt. De Ball sprung wall weer ruut, man dat Tor wurr van de neet immer overtügende Schiri geven. Hier lagg he wall recht, man up anner Sied, as **Bernd Grotlüschen** ´n groot Kans harr, fleite de Ofsied, ofwall de Tegenspöler minnestens noch twee bit drie Meter vör hum stunn. Neet toe begriepen, wat de Streekrichter dor anwesen hett. Lagg dat villicht doran, dat he vör de Leeraner Trainer **Pastorek**, de dauernd an d´ Streek up un daal leep un de Schiri, wenn de maal för Emden fleite, luudhals kritiseerte.

Ik kann dat so genau vertellen, wall ich stuuv achter hum un de Utwesselbank van Leer stunn.

Kickers Emden versöchte, dat Spöl toe kontrolleren. Un Kickers was ok beter, man de Leeraners wassen bissiger. Hauten mehr rin, ok in de Mann.

Bit up ´n Freetrapp van **Thilko Boekhoff** in de 20. Menüte un ´n Dübbelkans van **Tido Steffens** veer Menüten later, kwamm dor neet völ bi rut. De Leeraner Störmers harren in de lesd Tied van de eerst Halvtied ok noch ´n paar goed Kansen för ´n Tor.

Na de Paus murk man, dat Kickers dat Spöl unbedingt winnen wull. Germania truck sük toerügg un was blot noch mit Konters gefahrelk. Thilko Boekhoff skoot na ´n moi Alleengang in de 56. Menüte skarp up dat Tor van Germania, man Leers Torwart **Marcel Lücking** hull. In de 67. Menüte harr dat **Santos da Luz** mit Dreihskoet up dat Tor Pech. Twee Menüten later gung ´n Skoet van Thilko Boekhoff knapp over de Latt. In de 77. Menüte de **Andreas Flessner** in lesd Moment för **Kowalczyk**, de de Ball blot noch in ´t Tor van **René Carstens** unnerbringen muss, reddten.

Germania Leer de dorna mit Glück de lesd Menüten overstahn. Dat lagg ok doran, dat Thilko Boekhoff na 'n Toesammenprall mit **Julian Gläser** sük swaar verletzte un van Platz muss. Kickers Emden kunn neet mehr inwesseln, wassen doch al dree Mann inwesselt worden. Ja, ik segg ja immer, de dart Mann eerst, wenn dat würrlek nödig is, heel laat inwesseln.

Man namm toerst an, dat Thilko de Jochbeen broken harr. Man, un dat is moi, in 't Krankenhaus in Leer stellte sük herut, dat dat 'n Prellen was. Thilko, so was toe hören, traineert al weer mit de Mannskupp. Un dat is ok bitter nödig, so 'n goed Mann bruukt Kickers in de Middelfeld, will man an komende Sönndag tegen Rothenfelde winnen. Drücken wi all de Dumen, dat dree Punkten Sönndag in Emden blieven. Ik tipp up 'n 2:1 för Kickers.

So, nu so as alltied noch 'n Foetballsprök. Ditmaal de best

Fußballsprök van dat Jahr 2013:

“Links is ähnlich as rechts, blot up de anner Sied“, see

Patrick Funk van VFB Stuttgart 2. Mannskupp, de al in de U21 Nationalmannskupp spölt hett. He wull dormit seggen, dat he overall spölen kann.

So, leev Toehörers van Radio Oostfreesland,
ik hoop, Joe hett dat Plattdüütsk gefallen, denn mien Motto heet ja alltied,
plattdüütsk dürt - nettso as Kickers Emden – neet unnergahn.
Bit anner Maal

Joe

Erich Bolinius ut Emden-Petjem.

.